

**Kalaallit Nunaanni Inatsisartut Suleriaasiata allanngortinneqarnissaanik siunnersuut.**  
(Inatsisartut Siulittaasoqarfiat)

**Saqqummiussissut**

**Siullermeerineq**

Inatsisartut suleriaasiannik Siulittaasoqarfiup nutarterinerinermik ingerlatseqqinnerata ilaatut Inatsisartut suleriaasianni oqaaseqarnissamut piffissaliussanut allannguutissatut siunnersuut una saqqummiunneqarpoq.

Siunnersuutikkut Inatsisartut oqallittarnerisa aaqqissugaanerat iluarsivigineqassaaq, tassungalu ilanngullugu oqaaseqarnissamut piffissaliussat atuuttut tunngaviumik allanngortinneqassallutik. Tamatumani siunertarinearpoq oqallinnerit uummaarinnerusumik ingerlanneqarnissaannik aammalu akissuteqarnerit ikilineqarnissaannik kissaatigisat malinneqarnissaat.

Pingaartumik Inatsisartuni suliarinnittarnerup pisariillisarneqarnissaa aammalu siunnersuuteqartut Inatsisartunut ilaasortaagunik Naalakkersuisuugunilluunniit marloqiusamik saqqummiussisarnissaasa pinngitsoortinneqarnissaa siunnersuutikkut anguniarneqarpoq.

Taamaalilluni allaganngorlugu siunnersuutinik/ilanngussanik saqqummiussinerup saniatigut taakku atuarlugit saqqummiunneqartarnissaat nalinginnaasumik ingerlanneqartassanngilaq.

Siunnersuut partiinut Naalakkersuisunullu tusarniaassutigineqarpoq partiinillu sisamanit tusarniaanermut akissutit tiguneqarlutik.

Taama oqaaseqarlunga siunnersuut Inatsisartunut oqaluuserisassanngortippara.